

BOSNA I HERCEGOVINA
Federacija Bosne i Hercegovine
Tuzlanski kanton
OPĆINA GRAČANICA
OPĆINSKO VIJEĆE

Broj predmeta: 01-05-00776-2019
Broj akta: 01EN-001
Gračanica, 28.2.2019.. godine

Z A P I S N I K
SA 26. SJEDNICE OPĆINSKOG VIJEĆA GRAČANICA

Održane dana 30. 01. 2019. godine u sali za sjednice nove zgrade Općine Gračanica sa početkom u 11,00 sati.

Početu sjednice prisustvovalo je 25 članova Općinskog vijeća Gračanica.

Odsutni su: Sulejmanović Osman, Dizdarević Kemal, Dedić Dino, Alihodžić Nermina i Aljić Adem.

Sjednicu je vodio Nihad Krajinović, Predsjedavajući Općinskog vijeća Gračanica, zajedno sa zamjenikom Devedžić Almedinom i sekretarom Tukulj Dženanom.

Zapisnik vodila Mevlida Naimkadić, a vršilo se i tonsko snimanje sjednice.

Pored članova Općinskog vijeća Gračanica sjednici su prisustvovali i Općinski načelnik, Općinski pravobranilac, šefovi službi za upravu, predstavnici Etičke komisije: Sead Hamidović i Mersiha Jogunčić, izvjestioci po pojedinim tačkama dnevnog reda, poslanik u Skupštini TK Mirela Trepanić, poslanik u Parlamentu F BiH Mirsad Čamdžić, te predstavnici sredstava informisanja.

Zapisnik sa 25. sjednice Općinskog vijeća Gračanica, održane 27. 12. 2018.godine, usvojen je jednoglasno.

Mirza Džananović, kao novi vijećnik, dao je svečanu izjavu.

Sjednici je pristupio i Dizdarević Kemal, pa je prisutno 26. članova Općinskog vijeća Gračanica.

Predsjedavajući Vijeća Nihad Krajinović je elaborirao prispjele odgovore na vijećnička pitanja i inicijative.

Prije nego se krenulo na kandidovanje novih pitanja i inicijativa Predsjedavajući Vijeća je iznio slijedeće:

“Na početku sam još dužan saopštiti vam da smo prije nekoliko dana, a nakon što je već održana sjednica kolegija Vijeća, zaprimili jedan zahtjev za potpisivanje peticije da djecu treba liječiti iz budžeta, a političare iz poruka SMS.Kolegij je odlučio pred ovu sjednicu da će se zahtjev razmatrati do naredne sjednice i stav će biti prezentovan i vijećnicima i javnosti.Zato molim vijećnike, da ako je neko pripremio diskusiju u vezi ove inicijative, da danas ne iznosi nego da to uradi naredne sjednice kada i kolegij zauzme stav u vezi toga.

Nova pitanja i inicijative kandidovali su:

Nejra Hadžić:

“Ja za ovu sjednicu imam dvije inicijative.

Prva inicijativa glasi:

Inicijativa za predlaganje nadležnim službama općine Gračanica o mogućnosti realizacije projekta i postavljanje panoa sa Grbom Općine na ulazu i izlazu sa teritorije općine Gračanica na magistralnom putu M4, kao i postavljanje putokaza sa nazivima naseljenih mjesta na području općine Gračanica te putokaza za značajnije objekte, institucije i turističke potencijale općine Gračanica.

Obrazloženje:

Obzirom da smo jedna od razvijenijih općina na području Tuzlanskog kantona koja uskoro treba da ima status grada sa veoma jakim i razvijenom privredom a takođe i sve većom i uspješnijom turističkom zajednicom zbog čega našu Općinu posjećuje sve veći broj turista kako iz BiH tako i iz susjednih država. Smatram da naša općina treba da ima i jedno takvo obilježje odnosno pano sa grbom općine na kojem bi trebale biti naznačeni putokazi sa nazivima naseljenih mjesta i ulica kao i nazivi i putokazi za sve značajnije privredne objekte, institucije i turističke destinacije Općine Gračanica. Zato pozivam nadležne službe da razmotre navedeni prijedlog i mogućnost postavljanja istog.

Druga inicijativa glasi:

“Inicijativa za pokretanje zahtjeva ili inicijative od opštinskih službi Gračanica za odgovor na upućene inicijative JP Ceste Federacije BiH za izgradnju, odnosno završetak, trotoara pored magistralnog puta M-4 u naseljenom mjestu Stjepan Polje, dostavlja se.

Veza: Inicijativa od 28.02.2019.godine i inicijativa od 26.09.2018.godine.

Poštovani,

Obzirom da do sada nisam dobila nikakav odgovor povodom inicijative od 28.02.2018.godine kao i inicijative od 26.09.2018.godine u cilju zaštite učenika kao jedne od najugroženijih kategorija učesnika u saobraćaju, kao i drugih mještana Stjepan Polja, te evidentne činjenice svakodnevnog povećanja frekvencije drumskog saobraćaja ponovno pokrećem inicijativu opštinskim službama Gračanica za traženje dostavljanja odgovora na navedene inicijative upućene JP Ceste Federacije BiH.

Obrazloženje:

Trotoar pored magistralnog puta M-4 Doboju-Tuzla, kroz naseljeno mjesto Stjepan Polje, opština Gračanica, na relaciji objekat Benzinske pumpe “Trgovir” naselje Luke izgrađen je u toku 2010.godine. U prethodnom periodu bilo je određenih naznaka da se nastavi izgradnja istog cijelim tokom kroz naseljeno mjesto Stjepan Polje, ali to do danas nije urađeno. Obzirom da smo svjedoci svakodnevnog povećanja frekvencije drumskog saobraćaja, što je naročito izraženo na magistralnom putu M-4, posebno kroz naseljeno mjesto Stjepan Polje, u cilju dovršetka navedenog projekta i zaštite svih kategorija pješaka, a naročito učenika (koji svakodnevno koriste navedenu dionicu kako bi stigli do Osnovne škole u Stjepan Polju), pokrećem inicijativu za završetak trotoara na gore navedenim relacijama magistralnog puta M-4”.

Adnan Muslimović:

“Ja imam dvije inicijative i jedno pitanje.

Prva inicijativa je:

Inicijativu upućujem Općinskom načelniku, nadležnim službama, te Zavodu zdravstvenog osiguranja Tuzlanskog kantona da se u Gračanici, po uzoru na općinu Živinice, formira mobilni tim za ovjeru zdravstvenih knjižica.

Obrazloženje:

Zbog uplate godišnje premije osiguranja, odnosno markica za 2019.godinu, ispred ispostave Zavoda zdravstvenog osiguranja Gračanica prisutne su velike gužve i redovi građana koji čekaju ovjeru zdravstvene legitimacije. Situacija je dodatno otežana nedovoljnim brojem uposlenika u našoj poslovnicu. Brojni građani svoj red čekaju satima na ulici.

S obzirom na navedenu situaciju formiranje mobilnog tima bi smanjilo gužve, te na taj način olakšalo bi se i građanima i uposlenicima.

Takođe, smatram da bi na ovaj način mogli razdvojiti ovjeru knjižica i markica od ovjere uputnica, receptata, papira za operaciju i ostalih određenih dijagnostičkih procedura za koje je potrebna ovjera u Zavodu, a zbog čega su čak i teži bolesnici prisiljeni čekati, pa i satima stajati u redu.

Druga inicijativa glasi:

Kao vijećnik Općinskog vijeća Gračanica upućujem inicijativu prema Direkciji za puteve Federacije BiH da se pristupi izradi projekta izgradnje kružnog toka na magistralnoj cesti M4 na ulazu u Gračanicu (mjestu sadašnjih semafora).

Obrazloženje:

Već duže vrijeme na magistralnoj cesti M4 (Doboj-Tuzla), na raskrsnici gdje se sa magistralne ceste odvaja regionalna cesta Gračanica - Srnice, te put za Sočkovac, stvaraju se velike gužve i zastoji. Spomenuta raskrsnica predstavlja ujedno i glavni ulaz u Gračanicu, a nalazi se u industrijskoj zoni, tako da su gužve još izraženije. Semafori koji trenutno regulišu saobraćaj doprinose stvaranju tih zastoja. Kružni tok, kao znatno savremenije i praktičnije rješenje raskrsnica, u značajnoj mjeri bi smanjio, ako ne potpuno otklonio ovaj problem.

Vijećničko pitanje upućujem nadležnim općinskim službama i Javnom preduzeću "Komus" Gračanica koji je zadužen za timsko održavanje saobraćajnica u gradu, a glasi:

"Zbog čega trotoari nisu raščišćeni kada znamo da "Komus" ima dovoljno i radne snage i mehanizacije za to?"

Vahidin Smajlović:

"Ja za današnju sjednicu imam jedno pitanje i jednu inicijativu:

Moje pitanje je upućeno Predsjedavajućem Općinskog vijeća, Stručnoj službi Općinskog vijeća Gračanica.

Pitanje glasi:

Kada možemo očekivati prijedlog Odluke o naknadi za rad Predsjednicima vijeća mjesnih zajednica, a u skladu sa Odlukom o izmjenama i dopunama Statuta Općine Gračanica.

Obrazloženje:

Na sjednici Općinskog vijeća Gračanica koja je održana u novembru 2018.godine donešena je Odluka o izmjenama i dopunama Statuta Općine Gračanica. U članu 71. Statuta dodaju se novi stavovi 4 i 5 koji glase:

- Predsjednik mjesne zajednice za svoj rad prima naknadu iz Budžeta Općine, a u skladu s posebnom odlukom Općinskog vijeća.

- Mjesne zajednice će svojim Statutom regulisati pitanje naknade članovima vijeća mjesne zajednice u skladu s finansijskim mogućnostima mjesne zajednice.

Smatram da treba da otvorimo raspravu po ovom pitanju i da Općinsko vijeće donese odluku vezano za visinu naknade za rad predsjednicima vijeća mjesnih zajednica i da se rebalansom Budžeta planiraju ova sredstva, obzirom da sredstva za ovu namjenu nismo planirali u Budžetu Općine Gračanica za 2019.godinu.

Moja inicijativa upućena je Općinskom načelniku i Službi za prostorno uređenje, geodetske i imovinsko-pravne poslove Općine Gračanica.

Inicijativa se odnosi na odobrenje dodatnih količina soli i agregata za posipanje puteva u mjesnim zajednicama.

Obrazloženje:

Obilne snježne padavine i niske temperature u decembru 2018 i januaru ove godine rezultirale su pojačanim aktivnostima rada zimske službe po mjesnim zajednicama u cilju održavanja prohodnosti puteva. Usljed niskih temperatura stvara se poledica što iziskuje veoma često posipanje puteva sa soli i agregatom. Kao rezultat toga je znatno veći utrošak posipnog materijala i soli. Vjerujem da većina mjesnih zajednica je u situaciji da nema na zalih i agregat za posipanje ili ima minimalne količine, a snježne padavine i niske temperature se očekuju i u narednom mjesecu. Naročito se ovo odnosi na mjesne zajednice u brdovitim predjelima gdje je veća i potrošnja soli i posipnog materijala.

Iz tog razloga i upućujem ovu inicijativu u cilju boljeg održavanja puteva i osiguranja bezbjednosti u saobraćaju, obzirom da nabavka dodatnih količina soli ne zahtijeva veća finansijska sredstva, a štete prouzrokovane poledicom i lošim održavanjem puteva mogu biti veoma velike”.

Šehić Edin:

Za ovu sjednicu imam ukupno dva vijećnička pitanja i jednu inicijativu. Prije nego što pročitam vijećnička pitanja i inicijativu, moram se osvrnuti na odgovor koji sam dobio vezano za predsjedavajućeg što je i sam pomenuo izlagajući odgovore koji su pristigli. Danas mi je uručen ovaj odgovor i zaista moram pročitati kako stoji u odgovoru i u ime kolegija je potpis, što znači da iako smo usvojili Statut, evo i ovo što gospodin Vahidin govori mi to ne primjenjujemo. Primjenjujemo samo one slučajeve gdje nekom odgovara, što ste vidjeli i po smjenama određenih vijećnika u vijećima mjesnih zajednica, a neke stvari guramo pod tepih “Programom rada Općinskog vijeća za 2019. godinu nije predviđeno donošenje Odluke o statusu Predsjedavajućeg Općinskog vijeća, niti je bilo prijedloga za uvrštavanje takve odluke od strane niti jednog kluba, niti jednog vijećnika.

Na poslednjoj sjednici Kolegija Općinskog vijeća održanoj 18.1.2019. godine usaglašen je stav da se od klubova stranaka koji participiraju u Općinskom vijeću traži izjašnjavaње o statusu Predsjedavajućeg Općinskog vijeća u narednom periodu na osnovu čega bi se prijedlog odluke sačinio.

Napominjemo, da pravo na podnošenja nacrti i prijedloga odluka i drugih akata koje donosi Općinsko vijeće imaju i vijećnici, te vas pozivamo da dostavite svoj prijedlog odluke o statusu Predsjedavajućeg Općinskog vijeća Gračanica”.

Ovo zaista nije korektno, prije svega da sam dobio odgovor u materijalu, ja bih sigurno donio prijedlog odluke, danas na Općinsko vijeće. A druga stvar, mislim da je Stručna služba morala u skladu sa Statutom danas donijeti i staviti prijedlog Odluke na glasanje. Ali evo vidjet ćemo kako će ići dalje.

Dakle, prvo pitanje za ovu sjednicu jeste:

Da mi se dostavi analitika utrošenih sredstava po godinama, budžetske stavke za zimsko održavanje u protekle 3 godine (2016, 2017. i 2018), po svim mjesnim zajednicama, sa obavezujućim sljedećim podacima: Ukupan iznos usluge-troškova zimskog održavanja, ukupno održavanih kilometara, ukupan utrošak soli i posipnog materijala, po svakoj mjesnoj zajednici?

Obrazloženje:

Obzirom da na području općine Gračanica imamo nesrazmjerno različit kvalitet usluga zimskog održavanja po svakoj mjesnoj zajednici, posebno u protekle 2-3. godine, gdje se kvalitet ovih usluga u nekim mjesnim zajednicama znatno pogoršao, iako imamo stalno povećanje budžetske stavke za zimsko održavanje, smatram da je polazna osnova da se uradi analiza koliko se za koju mjesnu zajednicu izdvaja sredstava, koliko koja mjesna zajednica održava kilometara puteva i slično, kako bi se utvrdila realna/tržišna cijena kvalitetnog zimskog održavanja puteva po jednom kilometru na području naše općine.

Predlažem i tabelarni izgled traženih podataka, sa posebnim kolonama, koje je samo potrebno popuniti traženim vrijednostima:

Mjesna zajednica	Obračunati	Ukupno	Posipna so	Posipni material
------------------	------------	--------	------------	------------------

	troškovi usluge održavanja	obračunatih kilometara	u kilogramima	u m ³

Drugo vijećničko pitanje je:

Koliko na području naše općine ima registrovanih kladionica, te da li iste redovno izmiruju općinsku komunalnu taksu, odnosno koliki su ostvareni budžetski prihodi po osnovu komunalnih taksi za kladionice, za 2016., 2017., i 2018.godinu?

Obrazloženje:

Prema Odluci o komunalnim taksama, na području općine Gračanica, najveći razrez za komunalne takse imaju kladionice i igraonice na sreću. Unatoč relativno većem razrezu u odnosu na druge djelatnosti, koji se kreće od 3-5 hiljada KM za jedno prodajno mjesto, sve je veći broj kladionica prisutnih na području naše općine, a samim tim, vjerujem i bolje punjenje budžeta. O tome, da li je društveno korisno imati veliki broj kladionica, na ovako malom prostoru naše općine, te da li je utvrđeni razrez dovoljan, možemo saznati nakon analize koliko se naš budžet puni po osnovu obaveza za komunalne takse, jer se visina te obaveze donosi odlukom Općinskog vijeća Gračanica. Iz navedene analize, po dobijanju relevantnih podataka, siguran sam, da moja vijećnička inicijativa, koja proizilazi iz ovog pitanja, ima opravdan razlog i pozitivan smisao.

A vijećnička inicijativa glasi:

“Da se izvrši izmjena i dopuna Odluke o komunalnim taksama općine Gračanica, kada su u pitanju kladionice i igre na sreću, uz povećanje trenutnih razreza za općinsku komunalnu taksu od min 100 %, čija bi se nametnuta sredstva koristila za stipendiranje učenika i studenata”.

Obrazloženje:

Prema trenutnoj Odluci o komunalnim taksama općine Gračanica, razrez za komunalne takse koji imaju kladionice i igraonice na sreću, kreće se od 3-5 hiljada KM za jedno prodajno mjesto. Kladionice su obično smještene na dohvat ruke učenika osnovnih i srednjih škola, kao i studenata, ali zbog trenutnih zakonskih propisa općina nema nadležnost, niti mogućnost da to spriječi, osim na način da poveća obavezu za komunalne takse za kladionice i igraonice na sreću i ta uvećana sredstva, koja se po slobodnoj procjeni mogu računati preko 150.000 KM novih budžetskih sredstava godišnje, iskoristiti za stipendiranje učenika i studenata naše općine. Naravno, ovdje je moguć scenario i da se određeni lanci kladionica, zbog povećanja obaveze, povuku sa tržišta naše općine, što bi u tom slučaju povećalo društvenu korist naših građana i odgoja naših budućih naraštaja. U oba slučaja, bilo većom naplatom od kladionica za stipendiranje obrazovanja naše omladine ili smanjenjem broja kladionica na području naše općine i mjesnih zajednica, građani su na dobitku i vjerujem da će ova inicijativa dobiti podršku za dobrobit naših građana!”

Mirza Džananović:

“Ja za današnju sjednicu imam jedno pitanje i jednu inicijativu.

Prvo vijećničko pitanje glasi:

Zbog čega predstavnici Vijeća MZ Pribava skoro dvije godine nisu dobili termin za sastanak sa Općinskim načelnikom?

Iako je zahtjev za sastanak dostavljen više puta.

Danas sam dostavio novi zahtjev za sastanak sa Općinskim načelnikom na protokol.

Vijećnička inicijativa glasi:

Inicijativu podnosim Općinskom načelniku i nadležnim službama, a odnosi se na postavljanje saobraćajnih znakova i ogleđala na dvije raskrsnice i putu u neposrednoj blizini osnovne škole u MZ Pribava.

U prilogu su slike raskrsnica na kojima se može vidjeti da se radi o nepreglednim raskrsnicama.

Obrazloženje:

Na pomenutim raskrscima često dolazi do saobraćajnih nesreća, a razlog istih je nepreglednost.

Postavljanjem saobraćajnih ogledala smanjila bi se mogućnost izazivanja saobraćajnih nesreća, a samim time sigurnost pješaka bi bila poboljšana. Kako bi spriječili još jednu saobraćajnu nesreću, molim nadležne službe da izađu na teren i da adekvatno riješe ovaj problem.

Saobraćajni znakovi koji označavaju blizinu škole te dodatni saobraćajni znak za ograničenje brzine 30 km/h potrebno je postaviti na putu u neposrednoj blizini škole u dva pravca. Kako bi poboljšali sigurnost đaka i građana koji učestvuju u saobraćaju kao pješaci neophodno je postaviti navedene saobraćajne znakove”.

Džemal Jukan:

“Ja danas imam jedno vijećničko pitanje i jednu inicijativu. A evo uvoda za pitanje. Krenut ću otprilike sa inicijativom koju smo danas na kolegiju imali. Inicijativa je građana Tuzle, koju su prihvatile građanlije, a vezano je za liječenje djece iz budžeta, a ovi drugi da budu SMS porukama. Uvod je samo za moje pitanje, a pitanje glasi:

“Kada će se prostorije zgrade OSMIJEH-a dati na korištenje djeci sa posebnim potrebama?

Uvu inicijativu sam ja pokrenuo prije dvije godine. I evo pozivam sve nas, pozivam nevladin sektor, je li treba peticija Gračanici da pišemo. Ono gdje je vjerovatno Općinsko vijeće dalo zemljište na korištenje, možemo procijeniti da je to stotinjak hiljada maraka učestvovanje u finansiranju toga. Prije par godina, neću reći desetak, je dovedeno funkcija, sve je opremljeno, sve je tip-top, djeca ni dan danas nisu u tim prostorijama. Zgradu zub vremena uzima, devastira se, ne služi ničemu. Ja sam ovo pitao, nikad nisam dobio odgovor. Pitam ponovo i nemojte da nam neko iz Tuzle i pita, hajde da budemo svi odgovorni i da se uključimo i nevladin sektor i Općinsko vijeće, i izvršna vlast, da vidimo šta je s tim prostorijama i hoće li ikada ugledati svjetlost dana da onome zašto su namijenjena, tome i služe. Evo putem Općinskog vijeća ja molim da vidite, da li OSMIJEH kao nevladina organizacija postoji, je li registrovana i ko je kontroliše.

Drugo, moja inicijativa je na osnovu moja dva pitanja koja su postavljena prije.

Svaki put je to bilo aktuelno. Međutim, nekad sam dobijao odgovor, nekad i nisam na to. A inicijativa glasi:

U narednom periodu obezbijediti da javna preduzeća i javne ustanove čiji je osnivač Općinsko vijeće, imaju blagovremeno i zakonski imenovane upravljačke strukture.

Evo i danas, ja koliko znam, javno preduzeće “Vodovod i kanalizacija” nema direktora. On je imao uslove za penziju prošlog januara i februara, ali je bio v.d. Izašao je v.d., danas nema v.d.-a. Nije to samo u Vodovodu, tako je bilo i u obdaništu gdje nema ni Upravnog odbora, ni direktora, ni v.d.-a. Ja sam napisao i obrazloženje, te predlažem da se obavezno jednom godišnje Općinsko vijeće informiše po ovom pitanju, kako bi nadležni blagovremeno mogli poduzeti mjere iz svoje nadležnosti. Očigledno, ili neko zaboravi ili ima nekih drugih razloga, ali je postala praksa da ni jedna javna ustanova, ni jedno preduzeće, blagovremeno ne dobija nadzorni i upravni odbor niti direktora, tako da ja inicijativu upućujem Općinskom vijeću, znači da jednom godišnje imamo informaciju o ovom stanju. A vjerovatno iz te informacije nadležni će poduzimati mjere koje su u njihovoj nadležnosti”.

Alen Ibrišević:

“Za današnju sjednicu ja imam dva vijećnička pitanja:

Prvo pitanje upućujem MUP-u TK, PU Gračanica, koliko je u toku 2017. i 2018. godine licima koja imaju prebivalište na prostoru Općine Gračanica izdato potvrda o nekažnjavanju u cilju zaposlenja u inostranstvu.

Obrazloženje:

Svjedoci smo trenda svakodnevnog odlaska ljudi iz BiH u inostranstvo radi zaposlenja. Ovaj trend na žalost nije zaobišao ni Općinu Gračanica, te mladi ljudi svakodnevno napuštaju našu općinu, a nerijetko i cijele porodice odlaze u potragu za boljim sutra. Pošto niko nije do sada prezentovao podatak koliko je ljudi u posljednje dvije godine napustilo Općinu Gračanica, mislim da je ovo način da saznamo kakva je demografska slika Gračanice. Iz medija smo u proteklom periodu mogli vidjeti da su pojedine općine i kantoni u BiH već objavili slične podatke te smatram da je potrebno da imamo podatak i za općinu Gračanica.

Drugo pitanje upućujem Direktorima Doma zdravlja Gračanica, zbog čega se u 2019. godini naplaćuju usluge u stomatološkim ordinacijama koje se nalaze u sastavu Doma zdravlja.

Obrazloženje:

Stanovnike Općine Gračanica u 2019. godini Dom zdravlja je počastio sa novim nametom tj. u stomatološkim ambulancama u sastavu Doma zdravlja gdje je liječenje do sada bilo besplatno, od 2019. godine se naplaćuju usluge. Na ovaj način se stanovništvo općine Gračanica koje je do sada liječilo u stomatološkim ambulancama Doma zdravlja svjesno usmjerava u privatne stomatološke ordinacije. Građani se pitaju zbog čega izdvajaju svaki mjesec sredstva za zdravstveno osiguranje, te zbog čega plaćaju i dodatnu participaciju kada u konačnici sve usluge moraju da plate”.

Almedin Devedžić:

“Evo ja ću uputiti pitanje Općinskog izbornog komisiji Gračanica, odnosno predsjednici Zehri Mujačić.

Pitanje glasi:

Kada i ko će nadoknaditi štetu nastalu u Područnoj školi “Lohinja” u Lohinji u vrijeme izbornog dana povodom općih izbora 2018?

Ne znam da li je Općinsko vijeće upoznato, dešavanja koja su bila tog dana, izbornog dana, u Područnoj školi Lohinja, a to je škola pri Drugoj osnovnoj školi Gračanica. Tog dana su se dešavale aktivnosti, čiji je rezultat demoliranje toaleta, odnosno prostorija koje su služile i biračima i članovima biračkih komisija kao i demoliranje nekoliko klupa u toj školi. Na žalost i na insistiranje menadžmenta koji je tražio da se ta šteta namiri, nadležni nisu reagovali, ili su reagovali na način da ih to uopšte i ne interesuje. Ovom prilikom molim Opštinsku izbornu komisiju da se pozabavi tim slučajem i namiri štetu koja je nastala, kao posledica tog događaja i aktivnosti tog dana”.

Krajinović Nihad:

“Obzirom da sam i ja pripremio pitanje, da kažem identično pitanju vijećnika Alena Ibriševića. Ja ću ustvari samo preformulisati na drugu adresu.

Pitanje upućujem Zavodu zdravstvenog osiguranja Tuzlanskog kantona. Zbog čega se i kome sve, naplaćuju usluge u stomatološkim ambulancama Doma zdravlja u Gračanici?”.

Na prijedlog predsjednika Kluba SDA data je pauza u trajanju od deset minuta.

U nastavku sjednice prešlo se na raspravu o predloženom dnevnom redu.

Predsjedavajući Općinskog vijeća Gračanica Nihad Krajinović, pročitao je predloženi dnevni red 26. sjednice Općinskog vijeća Gračanica, koji glasi:

DNEVNI RED:

1. Razmatranje i usvajanje Prijedloga Odluke o privremenom korištenju javnih površina

Izvjestilac: Aida Hodžić, Šef Službe

2. Razmatranje i usvajanje Prijedloga Odluke visini naknade za zakup javnih površina radi postavljanja privremenih objekata
Izvjestilac: Aida Hodžić, Šef Službe
3. Razmatranje i usvajanje Prijedloga Odluke o prijenosu prava vlasništva na nekretnini licu čiji je stambeni objekat uništen djelovanjem prirodnih nepogoda
Izvjestilac: Aida Hodžić, Šef Službe
4. Razmatranje i usvajanje Rješenja o privremenom imenovanju člana UO JZU Gradska apoteka Gračanica
Izvjestilac: Općinski načelnik
5. Razmatranje i usvajanje Rješenja o izmjeni i dopuni Rješenja o imenovanju Komisije za utvrđivanje prometne vrijednosti nepokretnosti i prava
Izvjestilac: Općinski načelnik
6. Program rada Općinskog načelnika za 2019. god (informativno)
Izvjestilac: Općinski načelnik
7. Razmatranje i usvajanje Izvještaja o radu Općinskog vijeća Gračanica i radnih tijela (komisija) u 2018. g.
Izvjestilac: Dženana Tukulj, Sekretar OV
8. Razmatranje i usvajanje Izvještaja o rješavanju upravnih stvari u upravnom postupku u službama za upravu Općine Gračanica u 2018. Godini
Izvjestilac Alma Buljubašić, Šef Službe
9. Izvještaj o izvršenim procjenama prometa nepokretnosti i prava za 2018. godinu
Izvjestilac: Razija Junuzović, Predsjednica Komisije
10. Izvještaj o izvršenim mjerenjima zadovoljstva građana javnim uslugama i radu Općinskog vijeća
Izvjestilac: Alma Buljubašić, Šef Službe
11. Informacija o realizaciji vijećničkih inicijativa i pitanja u 2018. godini
Izvjestilac: Predsjedavajući OV

Nije bilo učesnika u diskusiji i dnevni red je usvojen jednoglasno.

TAČKA 1

RAZMATRANJE I USVAJANJE PRIJEDLOGA ODLUKE O PRIVREMENOM KORIŠTENJU JAVNIH POVRŠINA

Kratko uvodno obrazloženje na ovu tačku dnevnog reda dala je Aida Hodžić, šef Službe za upravu.

Prije nego je data riječ Aidi Hodžić, Predsjedavajući vijeća je naglasio da su svim vijećnicima dostavljeni prisitgli amandmani na prijedlog Odluke.

Amandmane su uputili Osman Sulejmanović vijećnik SDP-a i Naša stranka Gračanica.

Aida Hodžić je iznijela slijedeće:

“Da dam samo uvod vezano za prijedlog odluke.

Kao što piše u samom obrazloženju koje je napisano uz ovu Odluku. Postojeća Odluka o zauzimanju javne površine, bila je iz 2006. godine, tako da je bilo potrebe da se ona izmijeni. Odluka je u formi nacrtu razmatrana na sjednici Općinskog vijeća poslije čega je provedena javna rasprava o ovoj Odluci. Odluka je bila na web stranici Općine Gračanica, bilo je moguće svoje primjedbe i prijedloge dostaviti i putem e-maila u samoj službi ili pismeno. Održana je i završena javna rasprava ovdje u multimedijalnoj sali. Poziv je bio objavljen na WEB stranici Općine, Radio Gračanici i na oglasnoj tabli. U tom postupku nije došla ni jedna primjedba na nacrt predložene Odluke. Prilikom izrade prijedloga odluke Služba je razmatrala primjedbe koje su iznesene na sjednici Općinskog vijeća i uvrštene su u tekst Odluke što se i navodi u obrazloženju. U međuvremenu su dakle pristigli amandmani. A sada ja u ime predlagača dajem dva amandmana.

Prvi amandman, u odluci o privremenom korištenju javnih površina u članu 11. tačka 2 iza riječi 6,00 KM po m² dodaju se riječi osim u periodu od 1.10. do 31.3. kad naknada iznosi 4,00 KM po m².

Ja ću sad i pročitati kako će glasiti čitav član Odluke, da ne bi bilo zabune.

Znači, član 11. stav 2 glasi: za postavljanje bašti ispred ugostiteljskih objekata u ulicama Alije Izetbegovića, Ahmet-Paše Budimlije i Skver, 6,00 KM po m² mjesečno, osim u periodu od 1.10. do 31.03. kada naknada iznosi 4,00 KM po m². Dakle, taj član će izgledati tako.

Zatim, amandman na član 18. stav 1 se mijenja, a evo neka Dženana sekretar Vijeća pročitaj”.

Dženana Tukulj:

“Korisnik će javnu površinu koristiti po pribavljanju odobrenja kod nadležne općinske službe i sklopljenim ugovorom o zakupu s Mjesnom zajednicom. Takođe u članu 18 dodaje se novi stav 2 koji glasi:

Uz zahtjev za izdavanje odobrenja korisnik je obavezan priložiti i saglasnost Vijeća Mjesne zajednice u kojoj se javna površina koristi”.

Aida Hodžić je nastavila:

“Predloženi amandman u skladu sa Poslovníkom postaje sastavni dio prijedloga odluke s obzirom da je amandman Naše stranke kojeg je podnio vijećnik Saša Operhal na ovaj način djelimično uvaženo, predlažem da ga predlagač i povuče.

Takođe predlagač prihvata i sve amandmane i primjedbe Komisije za propise i to kako slijedi:

Da se u članu 14. tačka 1 iza riječi Alije Izetbegovića, dodaju riječi, osim u dane održavanja tradicionalnog vašera tako da će član 14. stav 1 glasiti, u ulici Alije Izetbegovića, osim u dane održavanja tradicionalnog vašera.

U članu 20 u stavu 1 na kraju rečenice u zagradi brisati broj (5) i u istom članu u stavu 2 riječi iza člana 19. tačka 1 zamjenjuju se riječima predhodnog stava tako da stav glasi: Za prekršaj iz predhodnog stava kaznit će se i odgovorno lice u pravnom licu novčanom kaznom u iznosu od 100,00 do 300,00 KM.

U članu 21. stav 2 riječi iz člana 20 stav 1 zamjenjuju se riječima, predhodnog stava tako da stav 2 člana 21 glasi:

Za prekršaj iz prethodnog stava kaznit će se i odgovorno lice u pravnom licu novčanom kaznom u iznosu od 50,00 do 200,00 KM.

Što se tiče amandmana vijećnika Osmana Sulejmanovića predlagač prihvata sve amandmane izuzev amandmana četiri koji se djelimično i kao predlagač da stav 3 člana 7 glasi: Ukoliko korisnik javne površine po isteku odobrenja za korištenje javne površine istu ne

dovede u prvobitno stanje, nadležna inspekcija će narediti dovođenje javne površine u prvobitno stanje, nadležna inspekcija će narediti dovođenje javne površine u prvobitno stanje putem javnog preduzeća a ne na teret korisnika javne površine.

Amandmane na prijedlog odluke podnio je vijećnik Osman Sulejmanović i predlagač od četiri amandmana, tri je potpuno prihvatilo a četvrti je korigovan. Pročitat ću sada i amandmane koji su prihvaćeni.

“Član 3. tačka 1. da se mijenja i glasi:

Postavljanje privremenih objekata tipa kiosk, garaža i slično.

U članu 4. pod C) tačka 1, na kraju rečenice dodati sledeći tekst, s tim da suncobran i tenda ne prelaze izvan zakupljenog zemljišta i treći amandman, u članu 11 u tački 11 gdje stoji 100 KM dodati riječ, paušalno”.

To su bili odgovori na pristigle amandmane”.

Saša Operhal je povukao svoj amandman.

Učesnici u diskusiji su:

Edin Šehić:

“Ja bih samo zamolio predlagača za pojašnjenje vezano za član 18 i ugovor sa MZ, vezano za naknade.

Dakle, da li će se ugovorom definisati da prihodi od toga, zavisno u kojoj je mjesnoj zajednici ta površina, pripadaju li budžetu te MZ? I ujedno da pitam kakav je status MZ Gračanica, obzirom da uvijek imaju problema oko ovih svih dešavanja, vašera i svega što se dešava na području MZ Gračanica?

Šta sa tim sredstvima i kako se tu tretira MZ Gračanica? Je li ona MZ kao ostale ili sredstva u MZ Gračanica idu u budžet Općine?

Odgovor je dala Aida Hodžić:

“Ova Odluka se ne odnosi na vašer. Prije svega za dane vašera ima posebna odluka.

A što se tiče javnih površina koje se zauzimaju u MZ Gračanica idu na budžet Općine i JP Komus, jer JP Komus održava sve te površine, a Općina iz budžeta održavanje plaća JP Komus Gračanica. A što se tiče člana 18 ja ću ponovo pročitati:

Korisnik će javnu površinu koristiti po pribavljanju odobrenja kod nadležne općinske službe i potpisanim ugovorom o zakupu sa MZ. Uz zahtjev za odobrenje korisnik mora priložiti i saglasnost MZ. Ovakav član je bio i u predhodnoj Odluci”.

Zaključena je rasprava i Odluka o privremenom korištenju javnih površina je usvojena jednoglasno.

TAČKA 2

**RAZMATRANJE I USVAJANJE PRIJEDLOGA ODLUKE
O VISINI NAKANDE ZA ZAKUP JAVNIH POVRŠINA
RADI POSTAVLJANJA PRIVREMENIH OBJEKATA**

Hasan Puškar je iznio stav Komisije za propise i Statut:

“Komisija je razmatrala prijedlog Odluke o visini naknade za zakup javnih površina radi postavljanja privremenih objekata i imamo slijedeću primjedbu:

Da u članu 4. tačka b) umjesto 15 % ratnim vojnim invalidima da stoji 20 %”.

Aida Hodžić u ime predlagača je prihvatila prijedlog Komisije.

Odluka o visini naknade za zakup javnih površina radi postavljanja privremenih objekata je usvojena jednoglasno.

TAČKA 3

RAZMATRANJE I USVAJANJE PRIJEDLOGA ODLUKE O PRIJENOSU PRAVA VLASNIŠTVA NA NEKRETNINI LICU ČIJI JE STAMBENI OBJEKAT UNIŠTEN DJELOVANJEM PRIRODNIH NEPOGODA

Nije bilo učesnika u diskusiji i Odluka o prijenosu prava vlasništva na nekretnini licu čiji je stambeni objekat uništen djelovanjem prirodnih nepogoda je usvojena jednoglasno.

TAČKA 4

RJEŠENJE O PRIVREMENOM IMENOVANJU ČLANA UO JZU GRADSKA APOTEKA GRAČANICA

Hasan Puškar je iznio stav Komisije za propise i Statut.

Komisija je takođe razmatrala i ovo Rješenje i imamo primjedbu na član 2 pošto po nama ima malo nelogičnosti, te predlažemo da tačka II Rješenja glasi:

„Dr. specijalista Amir Azabagić imenuje se iz reda predstavnika Ministarstva zdravstva Tuzlanskog kantona do okončanja provođenja procedure u skladu sa Zakonom o ministarskim, vladinim i drugim imenovanjima, a najduže tri mjeseca“.

Predlagač je prihvatio primjedbu, a Rješenje o privremenom imenovanju člana UO JZU Gradska apoteka Gračanica je usvojeno sa 23 glasa „ZA“ i 3 „SUZDRŽANO“.

TAČKA 5

RAZMATRANJE I USVAJANJE RJEŠENJA O IZMJENI I DOPUNI RJEŠENJA O IMENOVANJU KOMISIJE ZA UTVRĐIVANJE PROMETNE VRIJEDNOSTI NEPOKRETNOSTI I PRAVA

Nije bilo učesnika u diskusiji i Rješenje o izmjeni i dopuni Rješenja o imenovanju Komisije za utvrđivanje prometne vrijednosti nepokretnosti i prava je usvojeno jednoglasno.

TAČKA 6

PROGRAM RADA OPĆINSKOG NAČELNIKA ZA 2019.GODINU

Uvodno obrazloženje za ovu tačku dnevnog reda dao je Općinski načelnik Nusret Helić:

„Iako je Program rada Općinskog načelnika za 2019.godinu, kako ste vidjeli na pozivu samo informacija, ja ću dati par napomena.

Pred vama je jedna nova, drugačija forma Programa rada Načelnika i službi za 2019.godinu. Obzirom na obimnost, dostavljen je samo klubovima vijećnika.

Ona je definisana Pravilnikom o planiranju, praćenju i vrednovanju godišnjeg rada općinske uprave i izvještavanju koje je u skladu sa Zakonom o razvojnom planiranju i upravljanju razvojem u Federaciji Bosne i Hercegovine.

Pravilnikom se utvrđuju procedure za uspostavljanje standardne metode planiranja, praćenja i vrednovanja godišnjeg rada općinske uprave i izvještavanje Općine Gračanica, kao i osiguravanje adekvatnog učešća relevantnih subjekata, a prvenstveno zaposlenih u općinskoj upravi u realizaciji svake od navedenih faza u procesu implementacije Strategije razvoja i obavljanju redovnih poslova.

Planiranje, praćenje, vrednovanje i izvještavanje čiji je detaljan opis u pomenutom Pravilniku sastoji se od sljedećih ključnih koraka:

1. Godišnje planiranje,
2. Praćenje realizacije i treće je Izvještavanje.

Pravilnikom su utvrđeni i rokovi i odgovorni za implementaciju plana.

Toliko o tome zašto nova metodologija.

Osim uvodnog dijela u kome su iznesene nadležnosti, kratak opis stanja u prethodnoj godini, struktura službi i unutrašnja organizacija u Programu su utvrđeni i ciljevi općinske uprave, te planovi rada općinskih službi sa nadležnostima i ciljevima, budžetom, načinom mjerenja i izvještavanja, te raspoloživim ljudskim resursima.

Ciljevi općinske uprave za 2019.godinu ili osnovni ciljevi su sljedeći:

1. Unaprijediti efikasnost i efektivnost lokalne uprave bazirane na EU principima.
2. Javni i privatni dijalog partnerstva.
3. Intenzivirati razvoj poljoprivrede.
4. Inicirati sistemski pristup u razvoju turizma.
5. Poboljšati organizaciju tradicionalnih privrednih sajмова i efekte sajмова u privlačenju investitora.
6. Unaprijediti administrativne kapacitete za praćenje, kontrolu i izvještavanje o postignutim rezultatima Akcionog plana, energetski održivog razvoja i klimatskih promjena općine Gračanica.

U Programu su još prikazani strateški dokumenti za rad, prikaz redovnih poslova uprave, budžet Općine i ostali izvori finansiranja, te mjerenje i izvještavanje o uspješnosti uprave sa redovnim ocjenjivanjem rada zaposlenih.

Kao što stoji i u pozivu Program rada Općinskog načelnika služi kao informacija i ne usvaja ga Vijeće“.

Učesnici u diskusiji:

Edin Šehić:

„Meni se sviđa ovaj Program rada, odnosno ova nova metodologija jer je baš koncipirana i obuhvaćena da sa svim aktivnostima koje načelnik naravno sa službama planira da radi u tekućoj 2019-oj godini. Međutim, analizirajući materijal mislim da sam uvidio grešku bar onako kako sam ja to razumio. Prilikom usvajanja budžeta Općine Gračanica, to je na strani 28 kod stavke rekonstrukcija puta MZ Babići, naselje Husići, tamo smo pričali da je 15.000 za Kahvedžije put, bio sredstva građana i taj je trebao biti u ovoj rubrici za grantove, što bi umanjilo sa 47.500 na 32.500 KM. A stavka naselje Husići bi ukupno sa tri sa povećanim amandmanom načelnika znači 18.000 KM. Znači bez granta, jer smo rekli da ćemo prikupiti i bit će rebalans. Tako da jednostavno možete da provjerite da li je to tako zabilježeno. Mislim da smo tako usvojili, jer bila je greška oko preknjižavanja. Analizirajući kompletan Program rada, jeste možda evo jedno pitanje na kraju. Dakle analizirao sam broj uposlenih u općinskoj službi, odnosno u svim službama, pa i u kabinetu Općinskog načelnika i došao do podataka da je ukupno 111 zaposlenih, od čega 59 muških, 52 ženska uposlenika. S tim što kroz sistematizaciju, pravilnik o sistematizaciji planirano je dodatno upošljavanje, odnosno popuna radnih mjesta. Tako da službi za poduzetništvo nedostaje 9 uposlenih, za prostorno uređenje i imovinsko pravne poslove 10 uposlenika, za službu za upravu i društvene djelatnosti, ukupno je 36 uposlenih, ali nemamo nikakvo objašnjenje da li je to po sistematizaciji toliko, da li je popunjena kvota i da li je to ukupno 36 uposlenih. Ne znam zašto nema nikakvog pojašnjenja. Služba za civilnu zaštitu, nedostaje jedan i Kabinet načelnika nedostaje jedan.

Pa onako pitanje, obzirom da je ovo i dobar i zahtjevan Program rada općinskog načelnika i vjerovatno za unapređenje boljeg života svih građana na području općine. Samo pitanje da li će ta popuna radnih mjesta zbog kvaliteta usluga biti vrlo brzo? I evo obrazloženje u odnosu na druge općine da li je zaista općina Gračanica spremna da prihvati na svoj budžet toliki broj uposlenih?“

Vahidin Smajlović:

„Evo ovaj Program rada načelnika i službi za 2019.godinu je zaista jedan dobar, opširan dokumenat i želim da pohvalim. U programu su navedeni svi ciljevi Općinskog načelnika i općinskih službi. Znači, zadaci, obaveze, rokovi izvršenja, zadužene osobe. Imamo ovdje znači po službama, pregled svih zaduženja, aktivnosti. Imamo ono čime se bave službe, a često smo mi u situaciji da ne znamo po kom pitanju da se obratimo službi. Sada zaista imamo jedan dobar pregled. Navedene su sve programsko strateške aktivnosti sa rokovima izvršenja i zaduženja osoba, što znači da zaista možemo da pratimo koliko je ostvareno, u kom mjesecu treba da se realizuje neki projekat. Evo recimo, ovamo u Kabinetu Općinskog načelnika ima podatak web stranica, nova web stranica Općine Gračanica treba da bude do kraja januara 2019.godine i ona je mislim skoro i završena. Pa imamo tamo, ono što sam ja zapazio, do decembra 2019.godine treba da se sprovedu i neke nove tri istražne bušotine. Ima zaista, vrijedan dokumenat koji će nam svakako poslužiti da bolje možemo da pratimo ono što se planira. Navedeni su tamo i ciljevi općinskih službi gdje se vidi pojačana aktivnost, veća efikasnost u radu. Evo čini mi se Službe za prostorno uređenje 10 %, službe za poduzetništvo 5 % pojačane aktivnosti u radu. Znači to će nam dati nadam se bolje efekte i bolje zadovoljstvo građana. Na kraju da kažem, jedan dobar dokumenat, gdje kroz njega možemo da pratimo, dokle smo stigli, šta smo uradili ove godine a takođe može da posluži i kao planski ali i korekcionni dokumenat za narednu godinu“.

Odgovor je dao Općinski načelnik Nusret Helić:

„Tačno je da su tamo dati odgovarajući podaci sadašnjeg stanja. Vi znate da je donešen novi Pravilnik, da će biti unutrašnjeg pomjeranja, da mi imamo sada, a to je i u odgovoru Alena Mujića. 122 zaposlena jer imamo neke na određeno vrijeme. Znate, zbog čega? Procedure za zapošljavanje traju od godinu do dvije. Mi i sad imamo problem grupe, gdje nedostaje najprije u urbanizmu, dva urbaniste. Nedostaje pravnika. Dvije godine traje procedura, još uvijek su nekakve žalbe. Mi nećemo ništa mimo budžeta. Ako se vratite na budžet vidjeli ste da tamo da ćemo ove godine popunjavati negdje 4-5 i da smo obezbijedili. Ali smo tamo zaista utvrdili neophodne kadrove koji bi kad se popune mogli vidjeti tad daleko bolju sliku. Dakle, ima sad unutrašnjih pomjeranja, imate ovo da bi u urbanizmu radili, procedura traje dvije godine, nađemo modus pa primimo kao savjetnika na tri mjeseca da bi poslovi bili završeni. Najveći problem je ovo sporo zapošljavanje, tako da Šehiću neće biti nikakvih ekstremnih zapošljavanja ni udara na budžet. Mi ćemo polako spremati, mijenjamo malo ljude gdje je veća potreba, tako da ćemo na taj način pokušati biti efikasni“.

Predsjedavajući Vijeća je zaključio raspravu a o Programu se Općinsko vijeće nije izjašnjavalo.

TAČKA 7

RAZMATRANJE I USVAJANJE IZVJEŠTAJA O RADU OPĆINSKOG VIJEĆA GRAČANICA I RADNIH TIJELA (KOMISIJA) U 2018. GODINI

Kratko obrazloženje je dala Dženana Tukulj, sekretar Općinskog vijeća Gračanica:

„Ja ću samo jednu napomenu. Usvajanjem izmjena i dopuna Poslovnika, tamo je tačno naglašeno šta naš Izvještaj o radu Općinskog vijeća treba da sadrži. I u ovom Izvještaju smo korisitili tu odredbu.

I druga stvar ove dodatke, ako se sjećate to smo usvojili kao alat u okviru MEG projekta i Stručna služba je vodila evidenciju svih akata koji su doneseni i ovo je iz njihovog Programa kojeg su nam dostavili, a dostavili su svim Općinskim vijećima“.

Nije bilo učesnika u diskusiji i Izvještaj o radu Općinskog vijeća Gračanica i radnih tijela (komisija) u 2018.godini je usvojen jednoglasno.

TAČKA 8.

RAZMATRANJE I USVAJANJE IZVJEŠTAJA O RJEŠAVANJU UPRAVNIH STVARI U UPRAVNOM POSTUPKU U SLUŽBAMA ZA UPRAVU OPĆINE GRAČANICA U 2018. GODINI.

Nije bilo učesnika u diskusiji i Izvještaj o rješavanju upravnih stvari u upravnom postupku u službama za upravu Općine Gračanica u 2018. Godini je usvojen jednoglasno.

TAČKA 9

IZVJEŠTAJ O IZVRŠENIM PROCJENAMA NEPOKRETNOSTI I PRAVA ZA 2018. GODINU

Nije bilo učesnika u diskusiji i Izvještaj o izvršenim procjenama prometa nepokretnosti i prava za 2018.godinu je usvojen jednoglasno.

TAČKA 10

IZVJEŠTAJ O IZVRŠENIM MJERENJIMA ZADOVOLJSTVA GRAĐANA JAVNIM USLUGAMA I RADU OPĆINSKOG VIJEĆA

U sklopu ove tačke dnevnog reda učesnik u diskusiji je:

Vahidin Smajlović:

„Pa evo ovdje iz Izvještaja o izvršenim mjerenjima zadovoljstva građana javnim uslugama i rada Općinskog vijeća, možemo vidjeti da je rađena na bazi 300 ispitanika i od prilike imamo neko povećano zadovoljstvo od 3 % u odnosu na 2017.godinu. Ovo što je ostalo na istom nivou na osnovu ove ankete je uglavnom nekoliko usluga vezano za službenike Općine Gračanica, brzina, ljubaznost, vještina, znači ostalo je to na istom nivou u odnosu na 2017.godinu.Dok ove neke usluge imamo povećane.Ono što mene malo brine je ovdje, što je došlo do smanjenja zadovoljstva građana što se tiče rada mjesnih zajednica, rada vrtića, kvalitet javnih rasprava i slično.Znači, ljudi ispitanici su nezadovoljni, 63 % se njih izjasnilo da nisu zadovoljni sa radom MZ-a.Ono što sam takođe primjetio u ovom Izvještaju je da su uglavnom zadovoljni ispitanici sa područja urbanih sredina-Uglavnom su nezadovoljni socijalni slučajevi i stanovnici da kažem sa ruralnog područja, znači ovih seoskih područja.Možda bi dobro bilo prilagoditi ovo odnosno anketu, ne kažem da treba čovjeka pitati odakle si, jesi li sa sela ili si iz grada, ali nisu isti problemi ljudi u urbanim područjima i da kažem u ruralnim područjima da ne kažem seoskim područjima.Ljude recimo na selu brine voda, a ovdje imamo javno preduzeće koje dobro snabdijeva građane.Imaju znači riješeno pitanje vode, riješeno pitanje kanalizacije.Ne kažem da je ovdje sve riješeno, ali zaista imamo pogotovo neka mjesta, velike su to razlike.Uglavnom su odgovori nezadovoljstva davani od izabranika van urbanih sredina.Možda treba i više vremena a i sredstava da odemo u jednu MZ i tamo napravimo neke uzorke, pa da ispitamo, šta to muči mještane Prijekog Brda, šta to muči mještane Rašljeve recimo ili mještane ovdje na području MZ Gračanica.Uglavnom ono što sam ja takođe primjetio mislim da je anketa preobimna i mislim da se puno odgovora daje proforme radi.Možda čovjek ne zna ni šta ga pitamo i ako ta anketa traje deset minuta to postaje njemu dosadno. Možda da anketu prilagodimo onim zaista osnovnim životnim pitanjima da bi dobili i bolji uvid u anketu. Evo između ostalog nisu

građani zadovoljni ni sa radom Općinskog vijeća, jer se 52 % njih izjasnilo da nije zadovoljno a 48 % da je zadovoljno radom Općinskog vijeća. Nisu građani upoznati da mogu da dođu i prisustvuju sjednici Vijeća, da se prijave, da slušaju. Nisu upoznati da mogu da učestvuju u javnim raspravama. Trebalo bi možda u tom dijelu da malo poradimo, da ova anketa ne bude samo proforme radi, da zadovoljimo projekat MEG-a nego da i mi iz nje možemo da izvučemo pouku sve u cilju boljeg stanja i života na području općine Gračanica“.

Zaključena je rasprava i Izvještaj o izvršenim mjerenjima zadovoljstva građana javnim uslugama i radu Općinskog vijeća je usvojena jednoglasno.

TAČKA 11
INFORMACIJA O REALIZACIJI VIJEĆNIČKIH INICIJATIVA I
PITANJA U 2018. GODINI

Nije bilo učesnika u diskusiji, a Vijeće se nije izjašnjavalo o Informaciji.

Sjednica je završena u 13,40 sati.

ZAPISNIK VODILA
Mevlida Naimkadić

PREDSJEDAVAJUĆI
OPĆINSKOG VIJEĆA
Nihad Krajinović